

PELAJAR 21

KANGAU ARI TUHAN

Tuhan bisi atur ngagai setiap iko orang ti arap dalam Tuhan Jesus Kristus. Kangau iya nya enda semina besangkut enggau siti tuju ti manah ngagai kitai ti udah bulih pengidup meruan, tang ba maya tu mega iya ngangau ka orang ti bedau ngelala iya.

“Iya udah ngelepas ka kitai lalu NGANGAU ka kitai nyadi ka nembiaik iya empu, ukai ketegal pengawa ti udah digaga kitai, tang tegal nya ti dikedeka iya enggau laban pengasih iya. Iya udah meri ka kitai pengasih tu ulih Jesus Kristus apin dunya nyadi...” (2 Timoti 1:9).

“Nyadi laban kitai anak iya, kitai deka bempu pesaka ti diberi iya ka nembiaik iya, lalu kitai mega deka bempu sama enggau Kristus utai ti udah ditaga Allah Taala ka iya; laban enti kitai sama nat ka pemerinsa enggau Kristus, kitai mega deka sama enggau bempu mulia iya. Nyadi kitai nemu, semua utai sama dikereja pulai ka pemanah sida ti rindu ka Allah Taala, iya nya sida TI UDAH DIKANGAU ka pengarap nitih ka peneka iya empu.” (Rome 8:17,28). Peda mega ba ayat 29,30.

A. TUHAN UDAH NGANGAU KA KITAI.

1. Berengkah Ari Dunya Digaga

“Apin penumbuh dunya Allah Taala udah milih kitai ka nembiaik iya dalam Kristus awak ka kitai tuchi sereta nadai penyalah di mua iya. Laban pengerindu ati iya, kenyau ari pun Allah Taala udah ngeletak ka kitai nyadi anak iru iya ulih Jesus Kristus-nya ti dikerindu enggau dikedeka iya.” (Epesus 1:4-5). Peda mega ba 2:10 enggau Matthew 25:34.

2. Diserara Ari Dunya, Ngambika Nyadi Enggi iya

“Tang kita bansa ti endang udah dipilih, raban imam Allah Taala ti endang Rajah, bansa ti diserah ngagai Allah Taala nembiaik Allah Taala empu, udah dipilih diasuh nusi pemanah pengawa Allah Taala ti udah ngangau ka kita ari petang ngagai penampak ti pemandu ia.” (1 Peter 2:9).

3. Ngambi Ngamat Ka Tuju Tuhan.

“Nya alai anang malu besaksi ka Tuhan kitai; anang mega malu ka aku, ti kena tutup tegal iya. Tang tat ka pemerinsa ketegal Berita Manah, laban Allah Taala meri nuan kuasa iya. Iya udah ngelepas ka kitai lalu NGANGAU ka kitai nyadi ka nembiaik iya empu, ukai ketegal pengawa ti udah digaga kitai, tang tegal nya ti dikedeka iya enggau laban pengasih iya. Iya udah meri ka kitai pengasih tu ulih Jesus Kristus apin dunya nyadi...” (2 Timoti 1:8,9) Peda mega ba Rome 8:28, Pilipi 3:14.

B. KANGAU KITAI BA DUNYA.

“Surat ari Paul, nembiaik Jesus Kristus, rasul ti dikangau sereta diasuh Allah Taala nusoi Berita Manah iya.” (Rome 1:1)

Lebuh Paul ngambar ka kereja diri ti nyadi pemela, iya meri kitai teladan ianya kangau ngagai SETIAP iko orang ti arap bisi 3 leman:

1. Kangau Rama – “Ulun Ari Kristus”

Jesus udah mayar enggau rega ti mar ka kitai ngena nyawa iya empu.

“Laban ulun ti udah dikangau Tuhan ka nembiak iya, orang nya ditebus Tuhan; baka nya mega orang ti ukai ulun mensia ti udah dikangau Tuhan, nyadi ulun iya. Kita dibeli Allah Taala enggau utai ti berega; nya alai anang nyadi ka ulun mensia.” (1 Korint 7:22,23) Peda mega 1 Korint 6:19-20.

Lebuh Paul nyebut diri empu nyadi ulun (nembiak) ari Jesus Kristus, iya nunjuk ka reti ti dalam. Nitih ka adat lebuh rambau nya, enti lebuh maya datai hari ka siko ulun dilepas ka, tang laban penyinu iya ka tuan iya, milih enda dilepas ka ari nyadi ulun, iya deka ditanchum ba pending nyadi ka tanda. Tanda tu nunjuk ka iya ‘ulun ti penuh penggerindu’ ti deka nyadi ulun sepemanjai umur iya. (Pemansut 21:5,6; Ulang Adat 15:16.17).

Rasul Paul udah milih jalai pengidup iya nyadi ka nembiak ti penuh penggerindu ari Tuhan Jesus.

2. Kangau Ti Tetap – “Dikangau Nyadi Rasul”

Baka Rasul Paul dikangau ka nyadi rasul, baka nya mega siko-siko orang ti arap dikangau ka enggau pemeris ti bukai. Mayuh kangau ti enda sebaka ba Tubuh Kristus. Peda ba Rome 12:3-8, Epesus 4:7-16. Kangau Tuhan ngagai kitai, ianya nama utai ti patut digaga kitai deka ditemu lebuh kitai amat-amat ngiga peneka iya.

3. Dikangau lalu Diaghika – “Diselara Ketegal Injil”

Di dalam setiap kangau ngagai siko-siko orang bisa kangau ti nyemetak mega. Chunto ia, Peter enggau Paul taja pan seduai iya rasul, tang Peter mangku tanggung pengawa ba bansa orang Judah lalu Paul ngereja pengawa ba bansa orang bukai. Peda ba Rome 11:13 ; 1 Timoti 2:7 ; 1 Korint 12:4-11.

Kitai baru deka bulih kangau ti tetap enggau kangau nyemetak lebuh maya kitai ngayan ka kitai amat-amat “nembiak ti penuh enggau penggerindu”, laban kitai patut dulu belajar awak ulih diau dalam pengelantang ti datai ari Kristus sebedau kitai ulih DISURUH ulih iya.

C. NAMA KEBUAH IYA NGANGAU KA KITAI?

1. Laban Dunya Tu Penuh Ulih Pemetang.

“Kitai nemu, kitai endang enggi Allah Taala taja semua dunya tu dikuasa iya ti jai.” (1 John 5:19) Peda mega ba Epesus 6:17; Kolosi 1:13.

2. Laban Mayuh Orang Lapar Sereta Beguna Ka Tulung.

“Lebuh iya meda tugung orang mayuh, iya sinu ati meda sida, laban sida mayuh pengirau lalu enda nemu daya, baka raban bedus ti nadai orang ngibun.” (Matthew 9:36)

3. Awak Ka Ngayan Penemu Iya Ti Dalam.

“... awak ka jam ti diatu, ulih eklisia, sida ti megai perintah enggau kuasa di serega tau nemu penemu Allah Taala ti dalam, ti mayuh bengkah. Allah Taala ngaga iya nitih ka peneka iya ti meruan, ti ditembu iya dalam Jesus Kristus Tuhan kitai.” (Epesus 3:10,11)

4. Laban Maya Iya Nyau Semak.

“Ukai enda ko kita, ‘Empat bulan agi, baru ngetau.’ Aku madah ka kita, peda enggau manah ngagai tanah umai; utai ditanam diatu udah mansau lalu tau diketau!” (John 4:35) Peda mega ba John 9:4.

D. NAMA UTAI NYADI LEBUH KITAI DIKANGAU?

1. Kitai Ditempa Ulih Iya.

Ko Jesus bejako enggau seduai, “Titih ka aku, lalu aku deka ngajar seduai jalai ngulih ka mensia.” (Matthew 4:19) Peda mega ba Jeremiah 18:1-10.

2. Kitai Diajar Ulih Iya.

“Penyaup, ianya Roh Kudus, ti deka diasuh Apai dalam nama aku, deka ngajar kita genap bengkah utai, lalu ngasuh kitai ingat ka semua utai ti udah di ajar aku ngagai kita.” (John 14:26) Peda mega 1 Korint 2:12; 1 John 2:27.

3 Kitai Diasuh Ulih Iya.

“Aku ngasuh sida datai ka dunya tu baka nuan ti udah ngasuh aku datai ka dunya tu.” (John 17:18) Peda mega ba Mark 16:15.

Lebuh Tuhan ngangau, Iya datai sereta ngubah chara pengidup kitai. Tu beberapa iti chunto ari Bup Kudus pasal utai tu:

- a) Musa (siko pengibun bedus ba padang rumput): “Alai, lepaska nembiak Aku.” (Pemansut 3:1-12).
- b) Samuel (siko anak lelaki ti ngereja pengawa ka Tuhan) : “Angkat meh lalu bejako meh ke nembiak Aku.” (1 Samuel 3:1-19).
- c) Esekiel (siko orang tangkap ba menua bukai) : “Angkat meh, Aku ngirum ka nuan” (Esekiel 2:1-7).
- d) Bala murid (orang dagang, berikan) : “Titih ka Aku” (Luke 5:27,28; Matthew 4:18-22)
- e) Saul (siko munsuh orang Kristen) : “Angkat, nuan deka dipadah ka pasal utai ti enda tau enda digaga nuan.” (Kereja Rasul 9:1-9).

KOMITMEN AKU

Diatu aku nemu Tuhan udah bisa atur ka pengidup aku kenyau sebedau dunya nyadi, aku diatu nyerah ka diri enggau pengabis ati ka atur tu lalu deka nitih ka TUHAN sepemanjai umur aku. Aku deka ngajar orang bukai mega pasal kangau Tuhan ba pengidup sida.